



Ier han represchentants da las partidas burgaisas surdà a Berna l'iniziativa davart «ina finanziaziun gista» dal traffic.

KEYSTONE

# Betg pli «mulscher» ils automobilists

Ils votants pon decidir davart ina «finanziaziun gista» dal traffic

■ (sda/anr/vi) **Ord vista da las associaziuns per il traffic sin via vegnan ils automobilists mulschids ozendi. Cun l'iniziativa inoltrada ier vulan las associaziuns rinforzar il princip da chaschunader.** L'iniziativa «per ina finanziaziun gista dal traffic» na dettia betg en il dies al traffic public, ha ditg ier *Max Nötzli*, president dad auto-schweiz. Ins veglia plitost ch'ins tegnia en consequentamain il princip dal chaschunader. En l'avegnir duain ins duvrar tuttas entradas da la taglia sin carburant per bajegiar e mantegnair las vias naziunalas e l'infrastrucutra.

Ils cussegliers naziunals *Gerhard Pfister* (pcd/ZG) e *Jean-François Rime* (pps/FR) han fatg attent a la muntada da la via per l'economia publica. La via saja senza dubi la pli impurtanta pitga dal

traffic – «sche quai plascha uss u betg». Il comité cun represchentants da la pps, pcd e pld ha inoltrà ier l'iniziativa a la chanzlia federala per l'examinaziun. Tenor indicaziuns dals iniziants han 114 300 personas suttascrit l'iniziativa. Il termin per rimnar suttascripziuns scrudass pir en in mez onn.

## 1,5 milliardas pli pauc en la cassa federala

Oz flessegian las entradas ord la taglia sin carburant per ina mesadad en il traffic sin via e per l'autra en la cassa federala. Il 2012 han ins incassà trais milliardas francs ord la taglia sin carburant.

Sche l'iniziativa vegniss acceptada mancassan 1,5 milliardas a la confederaziun. I na saja betg chausa dals iniziants da mussar co ch'ins pudess stuppar que-

sta rusna, ha ditg *Max Nötzli* dad auto-schweiz.

Sper ina nova repartiziun dals daners vulan ils iniziants fixar en la constituziun ch'in augment da las taglias u taxas pertutgant il traffic sin via suttastat en l'avegnir al referendum.

## Perfin duas iniziativas

Da preschent vegnan anc rimnadas suttascripziuns per in'ulteriura iniziativa che prosegua ina finamira sumeglianta. Els iniziants derivan or dals tschertgels da la partida d'autos. Els vulan medemamain ch'ils retgavs da la taglia sin carburant vegnian duvrads exclusivamain per la via. Plinavant pretendan els ina limita per il surpli or da questa taglia per ch'ils daners na vegnian betg simplamain mo mantunads.